

Zeitschrift: Annalas da la Societad Retorumantscha
Herausgeber: Societad Retorumantscha
Band: 74 (1961)

Artikel: Andreas Rudolf Planta
Autor: Vital, Rico
DOI: <https://doi.org/10.5169/seals-225623>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 02.04.2026

ETH-Bibliothek Zürich, E-Periodica, <https://www.e-periodica.ch>

Andreas Rudolf Planta

da Rico Vital, Samedan

Liberted per tuots,
güstia per imminchün.

Tel ais sto il motiv dominant e'l muossavia per tuot l'operusited da cussgl. naz. Planta scu Engiadinais, scu hom da stedi e scu mneder da l'economia publica düraunt sia lungia e früttaivla activited a pro da sia vschinauncha patria, dal circul d'Engiadin'ota, da nos chantun e da la Confederaziun. Ils pü vegls traunter ils Engiadinais dad hoz haun forsa auncha cuntschieu a cussglier naziunel Andreas Rudolf Planta.

In mincha cas ans algordains sgür dad avoir già vis la reproducziun da sieu portret in öli chi penda illa stüva da cussagl da la Chesa Planta, cun quella fatscha seraina e giovuela, cull'öglieda vivais-cha ed intraprendenta e'ls leivs chi tradeschan ün'energia da fier. Sieus chavels alvs e las cotlettas, quella vouta a la moda al daivan ün'apparentscha d'ün bun e pissereus bap. Andreas Rudolf Planta ais naschieu als 24 avrigl 1819 a Samedan scu seguond figl da landamma Rudolf Planta. El ho passanto üna giuventüna seraina illa Chesa Planta in Plazet e ho frequento las scoulas cumünelas. Dal 1828 — 31 il chattains nus a l'institut Rosius a Porta a Ftaun, in quella scoula inua ch'ün nu mettaiva be il grand pais sül savair, dimpersè inua cha corp ed orma gnivan edüchos armonicamaing. Düraunt 4 ans ais Planta sto scolar da la scoula chantunela. Aviand quella vouta il gimnasi be 5 classas ais el sto sfurzo da banduner la scoula chantunela per ir in Germania, inua ch'el ho absolt ils examens da matura. Cun 19 ans s'imatriculescha il giuven stüdent a l'universited da Tu-

rich e cumainza sieu stüdis da giurisprudenza. Già dal 39 il chattains a Heidelberg, il sömmi da mincha stüdent da quel temp, e pü tard a Berlin. Zieva avair fat sieu doctorat cul predicat summa cum laude, fo'l specielmaing stüdis da la lingua francesca a l'academia da Ginevra. El ho giodieu la vita da stüdent plain romantica e poesia in cumpagnia da sieus comilitons toccantamaing, pustüt a Heidelberg, inua ch'el eira bainvis e stimo da tuots pervi da sia prontezza da spiert. Dasper però ho'l lavuro seriusamaing e s'acquisto las cugnuschentschas necessarias chi haun furmo la basa e las premissas per sia granda carriera politica. L'an 1844 tuorna il giuven giurist a Samedan e vain tschernieu auncha quel an aint il Grand cussagl scu rapreschentant da l'Engiadin'ota.

Il ram predilet da sieu stüdi eira sto l'economia publica. Ils problems da quaista interessaivan bger da pü a sieu spiert viv, energetic ed intraprendent cu la giurisprudenza cun sieus paragrafs süts. Per adampcher sias cugnuschentschas ill'economia publica, per imprendere a cugnuscher our d'egna esperienza las relaziuns commercielas ed industrielas, agriculas e socielas dals grands pajais europeaus, renunzcha Planta l'an 1846 ad üna candidatura illa regenza e viagia la Frauntscha e l'Ingialterra. Pustüt l'Ingialterra l'ho do pü d'ün impuls, ils quèls haun purto buns früts per noss'economia. Turnand dal 1847 d'Ingialterra cun l'intent dad ir bainbod in America, prorumpa la guerra dal Sonderbund e Planta vain clamo suot las armas illa cumpagnia Tscharner. Apaina glivreda quist'expediziun ho Planta danöv d'intrer in prümavaira 1848, alura cumandant da la cumpagnia Tscharner, in Val Müstair, per occuper il Pass da l'Umbrail, siand proruotta la revoluziun in Lombardia e'l Piemont.

Intaunt eira gnida elavureta ed acceptada dal pövel la constituziun federela ed in october ais Andreas Rudolf Planta gnieu tschernieu aint il Cussagl naziunel ill'eted da 29 ans. Cun que s'evra pel persvas republicaun ün nouv champ d'operusited. Al Cussagl naziunel ho'l fat part — cun üna pitschna interrupziun — (da 5 ans) dal 1848 — 1881. Dasper sieu talent e sias vastas cugnuschentschas possedaiva Planta auncha ün grand nummer da qualiteds specielas chi'l predestinaivan scu hom da stedi: la tenacited e perseveranza dal muntagnard, l'instancabla activited da l'industriel e commerciant da la Bassa giaivan maun in maun cun sieu esser gioviel e populer, accumpagno da la curtaschia d'ün hom galant chi ho giro il muond.

Dasper il stüdi profuond da mincha singul problem disponiva el d' üna logica severa e d'üna retorica penetranta. Sia independenza economica al permettaiva da's dedicher cumplettamaing als problems publics e da defender sia opiniun sainza piglier resguards a dretta ed a schneistra. Que nun ans do da buonder cha'l giuven cussglie naziunel s'ho s-chaffieu be dalum üna pusiziun frauncha e ferma i'l ravuogl dal parlamaint e cha sieu nom avaiva bainbod ün bun cling in tuot la Svizzra. L'activited politica da nos grand cumpatriot füss ün tema per üna lungia biografia per se. Duos trats characteristics distinguivan ad Andreas Planta dals bgers parlamentararis da quella vouta nempe sieu character integher e sieu curaschi parlamentari. El nun eira vaun, e que ch'el faiva, nu faiva el per amur da la persuna, dimpersè per amur da la chosa. El nun ho mê tschercho ne la favur da partieus politics, ne da singulas persunas. El nu tmaiva da ster aint e cumbatter per sia persvasiun, eir scha quella nu'l rendaiva populer. El nun appartgnaiva tar quels chi guardaivan il prüm inua chi's rechattess la magiuraunza per as drizzer lozieva. Uen grand avantach visavi als bgers parlamentararis furmaivan sias cugnuschentschas da las linguas. El discurreva e scrivaiva a perfecziun tuottas 4 linguas dal pajais, uschè ch'el pudaiva traficher cun mincha member da l'Assamblea federela in sia lingua.

Illa prüma sessiun da las chambras federelas avaivan quaistas da s' occuper traunter oter culs cuosts da la guerra dal Sonderbund e cul problem dal chantun da Fribourg, il quèl las truppas federelas avaiavan sforzo *cunter* la volunted da la populaziun d'accepter üna constituziun chantunela liberela. In quaist'ultima dumanda ho Planta piglio aint üna pusiziun tuottafat differenta da sieu partieu ed ho eir defais quella davaunt il Cussagl naziunel. In sieu votum ho'l stipulo publicamaing sieu credo politic, al quèl el ais sto fidel düraunt tuot sia activited politica. Ris-chand da gnir taxo ultramontan ho'l pretais aint il Cussagl naziunel: Liberted per tuots, güstia per imminchün! e cun que eir il dret pel chantun da Fribourg, da's der la constituziun cha la magiurited da la populaziun giavüscha.

Staivan da principi ils duos partieus politics in duos champs tuottafat differentes, s'haun plaun a plaun quietedas las uondas politics e las divergenzas traunter ils partieus, e tuottas duos gruppas s'haun chattedas a lavur comöna e constructiva a pro da la giuvna Confederaziun, dal stedi confederativ s-chaffieu tres la constituziun dal 1848.

Uena da las grandas incumbenzas dal parlamaint eira quella da s-chaffir las ledschas federelas in basa als artichels da la constituziun. Posta dazi, militer, stedi monetari, pais ed imsüras, giurisdicziun chi eiran fin cò incumbenzas chantunelas eiran dvantos d'ün di a l'oter problems federels. Siand però tuots commembers dal parlamaint consciants da lur incumbenza, furmaivan las chambras üna vaira famiglia, inua cha minchün luvaraiva a pro da la generalited.

La nouva orientaziun e'l svilup da nos stedi gniva seguito attentamaing da tuot las pussanzas europeunas. Per orienter objectivmaing ils pajais esters e'ls Svizzers a l'ester sur da la politica svizzra eira tenor Planta necessari da s-chaffir ün organ da publicaziun chi stai-va sur il niveau da las giazettas partischaunas dals singuls chantuns. Insembel cun Dr. Killias da Caira e'l consul Kind da Genova — chi eira eir ün Grischun — scopür insembel cul consul general svizzer a Londra, Rupp, e'l colonel Bachofen da Basel ho Andreas Planta tschercho, ed a la fin eir chatto ün interessent chi eira pront da surpiglier l'ediziun dad üna tela giazetta. Jent da Solothurn ho surpiglio l'ediziun dal «Bund» a cundiziun cha Planta pissera per duos redactuors qualifichos.

Duos da sieus amihs, Dr. Roth dal Thurgau e Karl Tschärner, alura redatur al «Liberaler Alpenbote» a Caira haun surpiglio l'an 1850 la redacziun responsabla dal Bund.

L'an 1860 avaiava il pövel grischun accepto üna proposta dal Grand Cussagl, da fabricher our ils pass da muntagna düraunt ils prossems 12 ans, premiss cha la Confederaziun detta üna subvenziun adeguata. Il Cussagl naziunel ho tratto quista dumanda in connex culla fabrica dal Furka e da l'Axenstrasse. Planta chi eira president da la cumischiun e referent i'l Cussagl naziunel ho do in sieu referat ün exposé extais da sias ideas sur da la valor da las vias per l'economia publica. Quaist exposé ais sto üna spezcha da program per sia activited merit las dumandas da trafic. Cò ün per impissamaints our da quel referat:

«Scha la colliaziun dals umauns traunter pèr fuorma la basa da mincha cultura e do l'impuls principel da mincha producziun, chi maina cun que a la benestanza naziunela, schi staun ils mezs chi intermedieschan quista colliaziun, q. v. d. las vias e stredas, in stret connex cun l'economia publica. Que cha la lingua vela scu mez ideel da communicaziun dad impissamaints, que cha la mu-

naida vela scu mez da barat, que velan las vias scu mez da comunicaziun materiel pel transport dals bains. Bunas vias güdan a l'economia privata scu a l'economia publica e fuorman a medem temps ils liams traunter las singulas gruppas da la naziun. Inpü servan las vias a la defaisa naziunela, perche che güdan las megltras armas e la megltr'armeda, sch'ella nun po esser al dret mumaint al dret lö. — La munaida impundida per bunas vias significha la megltr'investiziun da la munaida d'ün stedi, perche cha que sun expensas a favur da la generalited, e na da singulas classas. Taunt il pover scu il rich, taunt il pur scu l'industriel haun interess vi da buns mezs da comunicaziun e giodan ils avantachs da tels. Il pur ho taunt interess da vender facilmaing sieus prodots, scu'l pover da survgnir la roba chi nun ais chaleda memma ferm cun spaisas da transports.

Las armas venturas da l'industria moderna sun las forzas d'ova, e quaistas fuorman la fundamainta materiela da la grandezza industriela da la Svizra. Ellas sun il meglter mez per cumbatter la concorrenza da l'Ingialtetra, uschè richa da cravuns e fier. Las forzas d'ova in muntagna sun auncha explotadas be per pitschna part, perche cha maunchan las vias chi mainan tals lös d'explotaziun e chi faciliteschan las fabricas. La viafier ais arrivada fin al pè da las Alps grischunas (Cuir), ma ans maunchan auncha las vias chi collian las valledas lontaunas chi haun da furnir la forza electrica. — Uen as sbagia fermamaing sch'ün craja cha'l problem da trafic in Grischun saja scholt, pervi cha'l Grischun ho fabrico ad egen quint il Splügia e'l Gügliä chi traversan il chantun diametrel. Pür memma pretendan quaistas duos vias la colliaziun cullas vals laterelas. Scu cha las arterias dal corp umaun haun dabsögn d'ün inter sistem dad otras avainas per survgnir e der giò nudritüra a l'inter corp, uschè sto que eir cullas arterias dal trafic, cullas viasfier e vias. Bunas vias portan trafic, il trafic allimentescha l'economia publica, la producziun vain augmentada ed ameglioreda, e las forzas da la natura as collian culla lavur umauna.»

Zieva quistas explicaziuns generelas sur da la valor da las vias ho Planta analiso davaunt il Cussagl naziunel il proget suottamiss dal

chantun Grischun dal puoch da vista commercial, politic e fiscal, muossand vi süll'importanza da mner las vias fin al cunfin, a Campocologno, Martina e Müstair. Infin Castasegna eira la via già fabbriched'our cul Güglia. Uschè s'avriva il trafic dal Grischun cun l'ester. Però neir las vias internas nu sus-chaivan gnir schmanchedas, scu p. ex. il Schyn, il Flüela ed otras chi avaivan dad augmenter il trafic in Grischun stess. «In fabbrichand our las vias vain fructificho il commerzi in Grischun, ils gods, las funtaunas d'ova minerela e las forzas d'ova paun gnir explotos pü bain ed in conseguenza haun las chaschas comünelas, la chascha chantunela e federela pü grandas entredgias», agiundscha Planta.

Prova da sia iniziativa e da sieu spiert intraprendent do il fat, ch'el nun as cuntantet be dal program suottamiss dal Grand Cussagl, dimpersè el svesch amplifichescha quel davaunt las chambras federelas, in mettand tiers auncha il Pass da l'Alvra, chi nun eira previss i'l program chantunel. Ed il Cussagl naziunel ais seguieu a sieus intents ed ho concess dasper ils credits giavüschos dal chantun Grischun auncha 100 000.— francs pel Pass da l'Alvra, scha per cas cha'l chantun as decidess posteriumaing da'l fabbricher. Ils cuosts totels eiran previs per l'Alvra fr. 265 000.— Turnand da Bern culs credits giavüschos, ho'l suottamiss la dumanda da l'Alvra danövamaing al Grand Cussagl. Quaist però ho decis da dumander dal pövel be ün credit da 50 000.— fr., vuliand uschè indirectamaing impedir la fabrica da l'Alvra, per cha quaist nu concurrenzescha il Güglia e'l Flüela. Planta però nun as laschet intemurir, e per rabler insembel ils 115 000.— frs. chi maunchaivan, ho'l furmo sün via privata ün comite da l'Alvra. El vulaiava a tuot cuost cha'l Pass da l'Alvra gniss fabbricho, perchè sieu pass predilet mnaiva da Cuira «immez il cour da l'Engiadina» scu ch'el dschaiva.

Uena part dals cuosts surpigliettan Bravuogn e La Punt e'l rest ho el ramasso in basa da subscripziuns privatas. L'Alvra ais gnieu fabbricho ed uschè ho Planta miss sia vschinauncha patria illa cruscheda dal Bernina-Alvra e da la via imperiela Clavenna — Finstermünz!

Dal 1865 vain Andreas Planta tschernieu president dal Cussagl naziunel, in quel mumaint cha la revisiun totela da la costituziun eira gnida accuta. Scu president dal Cussagl naziunel ho Planta tgnieu ün fulminaint pled in occasiun da la festa federela da tir a Schaffusa. Traunter oter ho'l dit:

«Hoz as dumandan bgers, cha scha tar la prossma revisiun da la constituziun nun ho il pövel il dret da dumander da pü vusch in chapitel tar la politica federela?»

Cun que ho el ventilo per la prüma geda il problem dal referendum. Tar la revisiun dal 72/74 ais alura gnieu introdüt il referendum facultativ scu cuntrapais al parlamentarisssem e'l bürocratisssem chi s'avaiva sviluppo duraunt ils ans a Bern. Planta füss ieu gugent auncha ün pass pü inavaunt in introduënd il referendum obligatori eir per ledschas,perche culla nouva constituziun survgniva la Confederaziun bger dapü drets, que cha'l föderalist Planta ho cumbattieu düraunt tuot sia operusited i'l parlamaint. El eira persvas, cha'l centralisssem desdrüa tuots princips föderalists e cha la Svizzra possa be exister sch'ella piglia resguard süllas particulariteds linguisticas, religiosas, geograficas ed etnograficas. El eira eir persvas cha la concentraziun da l'autorited dal stedi in ün unic lö transmüda quella in ün bürocratisssem chi stu stendschanter tuots interess e tuotta iniziativa dal singul. Our da telas ed otras ponderaziuns stuvaiva Planta esser cunter la revisiun da la constituziun. Quella gnit però accepteda e que eir dal chantun Grischun cun 10 624 schi cunter 9 492 na.

Cò vögl interrumper quista lingia. Eau d'he già fat menziun cha be sia activited parlamentaria furniss materiel avuonda per ün stüdi pü lung sur la persuna da Planta. Ch'el nun ais adüna gnieu inclet, neir illa stretta patria, demuossa il fat cha zieva esser sto aint cun persuasiun per üna megltra situaziun dals domicilios in Grischun e cha quista ledscha eira gnida accepteda dal pövel, l'Engiadin'ota nu l'ho pü tschernieu aint il Grand Cussagl, l'an 1873, q. v. d. el nu ais gnieu pü miss sü scu candidat. Quaista nova s'ho deraseda scu ün fö illas valledas grischunas, ed al di da la mastralia ais el gnieu tschernieu scu rapreschantant dal Surset ed a medem temp eir da la Cadi. El ho accepto la rapreschantanza dal Surset. Zieva ch'el s'avaiva retrat dal 1869 dal Cussagl naziunel, siand fermamaing occupo culs problems da la viafier e dals bagns minerels, ho'l candido danövmaing dal 1875. Sieu cuntercandidat eira Johann Romedi da Madulain chi ais gnieu tschernieu cun 14 vuschs dapü cu Planta. Romedi però murit già dal 1876 e Planta ais alura gnieu tschernieu sainza opposiziun.

A Planta nu bastaiva però be sia activited parlamentaria. Sieu spiert productiv e creatur i mettaiva cuntinuantamaing davaunt nouvs pro-

blems, pustüt sül champ economic, e que surtuot problems chi tuchai-
van ils interess dal chantun Grischun, al quèl el eira attacho cun corp
ed orma. Eau vögl cò be manzuner ün pèr problems principels dals
quèls Planta s'ho occupo intensivamaing e sacrifico temp e munai-
da: Vias — telegraf — posta — viasfier — bagns da San Murezzan,
Scuol-Tarasp e Bormio — gods ed agricultura.

Nus tuots cuntschains la situaziun economica odierna da nos chantun
in generel e da la granda part da las vschinaunchas d'Engiadina in
speciel.

Daspö ans exista üna cumischiun per introdür novas industrias in
Grischun, ed eir tar nus vegnan discus vi e no il medem e sumgiants
problems e vain pruvo da schoglier quaists problems moderns. —
Moderns sun quaists problems be apparentamaing. Già avaunt passa
100 ans s'occupaiva il public cun las istessas dumandas. L'an 1850 ho
la Societed svizzra d'util public gieu sia radunanza generela a Cuira
e'l cussglier naziunel Andreas Planta ho survgnieu a l'eted da be 31
ans l'incumbenza da respuonder i'l referat dal di sün las trais se-
guaintas dumandas:

1. In che möd paun gnir augmentedas las funtaunas da gua-
dagn e la benestanza da la populaziun muntagnarda chi
s'occupa da l'allevamaint da muaglia?
2. Quaunt inavaunt as po arcumander l'introducziun dad in-
dustrias in regiuns muntagnardas?
3. In che fuorma s'adatta l'industria per quaista populaziun
il pü bain e cu as lascha introdüer quaista industria il pü
facil?

Sieu exposé sur quaistas dumandas tradeschan sün tuot la lingia ün
möd da penser geniel ed ün spiert aviert a tuots problems dal temp.
El tradescha ün prevair da las chosas chi i'ls prossems ans e decennis
haun occupo ils mneders da nos pövel. — In basa d'üna statistica
exacta muossa'l vi sül fat cha l'emigraziun periodica e definitiva our
da cuntredgias muntagnardas ais bger pü intensiva cu our da l'otra
part da la Svizzra. Uschè eiran emigros ils ultims 4 ans ca. 2 000 Gri-
schuns e da quel temp as rechattaivan passa 10 000 Grischuns a l'
ester q. v. d. 10⁰% da tuot la populaziun. Quaist fat daiva bger da
penser, pustüt causa cha illa part muntagnarda da la Svizzra eira

già quella vouta ün maungel da populaziun. «Que ais vaira» ho dit Planta, «cha'l viver ais pü facil e main stentus illa sumbriva dals chastagners e nuschers, illa vicinanza da l'üja e dasper ils vasts ers da granezza, cu illa regiun inua cha la grusaida s'avicina als lös da dmura dals umauns, inua cha l'inviern ho düraunt 8—9 mais l'an il cumand e nu lascha crescher e madürer bod ünguotta. Que ais vaira cha'l chaunt melodius dal grigl siciliaun ho pü attracziun cu'l frantuner da las lavinias, e'l scuttöz da las uondas dal lej da Turich e Ginevra pü attracziun cu'l sfrantamöz d'ün torrent s-chadagno. Però scha as tegna adaint da tuot ils factuors, da tuot ils duns cha'l pajais muntagnard ans offra tres la natüra, schi as stu cunvgnir, cha las varts positivas sun pü grandas cu quellas negativas.»

Alura ho Planta analiso l'economia alpestra, l'economia dals pros e l'allevamaint da muvel e fat propostas praticas per amegliorer quaist ram fundamentel da l'economia muntagnarda. Quaists rams da l'economia purila eiran quella vouta fermamaing neglets. El stipulescha la necessited da l'arrondimaint da fuonz e dad urbariser e megliorer terrain infrüttaivel e cuntinua dschand: «cha quel terrain purtaro ün oter guadagn, cur cha l'areder da la cultura sduvlaro il terrain sech e fructifichescha la terra a nouva vita». Pü inavaunt pretenda'l ün' explotaziun raziunela dals gods e da las funtaunas d'ova minerela e disch, cha cul svilup dals prodots primitivs as do que da se, cha tuot-tas professiuns chi staun in contact cun l'elavuraziun dals prodots primitivs as sviluppan e portan früt, pustüt la misteraunza.

Areguard l'industria fo Planta attent süllas varts sumbrivantas, saja que fisicalas u morelas, «però» cuntinua'l dschand: «ill'industria festagia il spiert uman il triumf sur la materia. Tals Phöniziers e Grecs dal temps antic, tar las citeds libras da l'Italia e Germania dal temp d'immez, tar l'egemonia mercantila da l'Ingialterra e tar l'USA dad hoz (avaunt 100 ans) vaun maun in maun civilisaziun e liberted e fructificheschan l'educaziun e la cultivaziun dal spiert, da quel spiert chi dominescha la materia.» Our da motivs topografics nun artegna Planta il Grischun adatto per l'industria. Siand la populaziun in pitschen numer ed auncha sparpagliada nu po ün'industria as svilup-per cò, perche quela dumanda bgers mauns chi lavuran bunmarcho per pudair concuorrer culs pajais esters. I'ls ultims 100 ans s'ho müdeda almain per part la situaziun. Our da motivs economics, morels e culturels arcumanda Planta però d'introdüer l'industria chasauna,

pustüt l'industria chi sto in connex e chi elavura ils prodots primitivs dal pajais.

Pü ot cu guadagn e bainster economic stima Planta la cultivaziun ed educaziun dal character. Dasper l'educaziun intellectuella stu gnir cultivo in prüma lingia il spiert da las virtùs cristiaunas: l'onurabilitè, la simplicited, la lavuriusited, la moderaziun, il redschamaint e la renunzcha in tuot las classas dal pövel. Pü edücho e pü rich ch'ün ais e pü grand chi ais sieu dovair dad ir avaunt cul exaimpel da la simplicited republicauna e da la pürezza e dad eviter tuot il lusso exterior chi ais uschè cuntagiüs. «Tü però, figl da las muntagnas», uschè glivra Planta siu referat, «Tü chi guardast cun brama vers las rivas dal Mississippi e vers l'or da la California, guarda üna geda la lavur, las renunzchas, la stainta e la forza da volunted cha michün chi emigrescha drouva per gnir inavaunt a l'ester! Guarda alura süls ers e pros da tia patria e dumanda't: che pudess eau raggiundscher cun ün tel sforz? Schilafè, tü e'ls tieus avaros sgür in avegnir in patria avuonda per viver furtünos e ster bain!»

Cha ad ün uman uschè talento scu cha ais sto Andreas Planta sun adüna darcho gnidas surdedas incumbenzas e missiuns specielas in quels temps da grand'evoluziun e svilup s'inclegia bod da se stess. Uschè ho il Cussagl federel incumbenzo a Planta dal 1815 da mner tres l'inquisiziun ill'«affaire» Mazzini e'ls giuvens fùgitivs da l'Italia giò'l Tessin. E Planta chi avaiva fat sieus preparativs per ün viedi in America ho desistieu da quaist, na gugent, però sieu sen da responsabilitè invers la patria l'obliet da renunzcher a giavüschs a favur da la generalited. — L'an 1852 ais el in mischiun pel Pitschen Cussagl in Germania, inua ch'el tscherca dad interesser circuls commerciels per la cuntinuaziun da la viafier davent da Rorschach fin a Cuir e sur ün pass da muntagna fin in Italia. Eir cul marschal Radezky chi eira quella vouta guvernatur da la Lombardia ho'l traficho in merit. Que sun be duos exaimpels da sias bgeras mischiuns ch'el ho surpiglio e mno tres. El ho fat part a la cumischiun federela per s-chaffir üna ledscha concernent il dret comercial e da cambièlas e vain tschernieu 'il cussagl da survagliaunza da la Rentenanstalt e commember-suppleant dal cussagl da scoula svizzer, al quèl el ho fat part in fin l'an 1880. Zieva cha l'ambaschadur svizzer in Austria s'avaiva retrat dal 66 ais gnieu tschernieu Andreas Planta dal Cussagl federel scu sieu succesur, in vista a sias capacitads e pervi

ch'el eira già gnieu in cuntact cun diplomats da differents pajais in dumandas da las viasfier dallas Alps. Ma Planta nun ais sto bun da's resolver d'accepter quai post fich onurific, perche sieu temperamaint e'l bsögn da praster lavur pratica nun avess chatto sün ün post uschè convenziunel üngüna satisfacziun. El eira persvas da praster megladra lavur a pro da sia patria in pajais stess ed uschè renunzchet el sün quai sta clameda. Cun tuot cha la politica sül champ chantunel e federel e las dumandas da trafic naziunelas ed internaziunelas absorbaivan üna granda part da sieu temp, chattaiv'el adüna darcho eir temp per s'occupar culs pissers e fastidis da sia vschinauncha patria e da la valleda. Ad el ingrazcha p. ex. Samedan la reorganisaziun da l'administraziun comunela, la reglementaziun da l'utilisaziun dals gods e pasculs, la tscherna d'ün silvicultur comünel, lönch aunz cu cha'l uorden da god chantunel perscrivaiva üna tela. Sün sieu stimul aisa gnieu fat l'imsüraziun dals gods da Samedan ed introdüt l'implantaziun da quels. Eir s'occupaiva el adüna darcho culla correcziun da l'En e dal Flaz chi eir quella vouta occasiunaivan grands dans in tuot la champagna. El ho elavuro ils novs statüts da cumön e stipulo ün plan per introdüer ospidels circuitels, il quèl ais gnieu accepto dal Pitschen Cussagl.

Per render pü cuntschaint l'Engiadina e pustüt sias funtaunas d'ova minerela als scienzios, ma bain eir per der pü relief a sia vschinauncha patria ho Planta stimulo l'an 1863 la Societed svizzra per scienzias natürelas d'organiser lur radunanza generela a Samedan. Que eira bain ün'interpretaisa temeraria, da vulair fer gnir quai societed da scienzios in üna vschinauncha muntagnarda. Ma da quai dieta s'impromettaiva Planta ün svilup rapid dal trafic d'esters chi pigliaiva quella vouta fuormas pü precisas in Engiadina. Que nun eira facil d'alloger e custodir ils 118 delegios, d'organiser ils viedis in charrozza illa vicinaunza e da preparar ils ambiants pels referents. Tuot l'organisaziun ho surpiglio Planta e cur cha'l di eira cò nu mancaiva il punct sül i. Daspö quella vouta s'ho raduneda quai societed be pü üna geda e que a Segl per fer onur a la giuvna Societed engiadinaisa ed a la quarta lingua. In sieu pled d'avertüra ho cussglier naziunel Planta do ün sguard sül svilup culturel dal Grischun, intrand alura süls problems politics dal di, trand in streda eir il cumbat da quel temp per las viasfier dal San Gotthard, Lucmagn e Splügia ed el ho glivro dschand:

«Nos unic giavüsch ais quel, ch'ün mê nu schmauncha in Svizzra, cha'l bainster da tuot la Confederaziun ais pür alura sgüro, sch'ün lascha sün tuot la lingia libra via al svilup, s'imperchü-rand da promover ils interess unilaterels da la magiuraunza sün cuosts da las minoraunzas. Na la monotonia, dimpersè la diversited e l'autonomia da la vita individuela edüchescha las vairas natüras republicaunas e mantegnan e vivificheschan l'amur per la patria.»

A l'iniziativa da Planta ingrazcha Samedan eir sia exposiziun da la misteraunza dal 1867 e l'exposiziun agricola dal 69. Eir tar quaistas reuniuns localas profita Planta da l'occasiun per sclerir ed edücher sieus convischins. In sieu pled d'avertüra da l'exposiziun da la misteraunza loda'l il vegl Engiadinais, chi, sfurzo pervi da la terra infertila ho adüna darcho gieu da banduner la val per as sgürer sia existenza. Our dal pur as sviluppet a l'ester il misteraun e'l commerciant, chi eira bain attacho a sia patria stretta, ma chi mettaiva a disposiziun sia intelligenza e sias forzas a pajais esters. Da l'otra vart as faiva però adüna dapü valair la concorrenza dad affers esters. Our da quaist motiv saja da salüder cha'ls mistrauns indigens hegian clappo rischs fermas in patria e ch'els vegnan sustgnieus. Però a nu basta, ch'ün as cuntainta d'ün guadagn momentan e passager. Per arriver ad ün bainster dürabel nun as suos-cha esser ozius. La güstia illa natüra recumpensa a l'inlungia be a quel chi lavura di ed an instancabelmaing, be a quel chi impuonda di per di sias forzas as fortifichand uschè morelmaing tres tuot sia vita.

Quaists plets proferieus quella vouta haun mantgnieu lur valur infin al di d'hoz ed eir per l'avegnir. Avessan taunts e taunts Engiadinais ils piglios a cour, avessan taunts e taunts Engiadinais vivieu in simplicited, in lavurusited e spargnuossamaing, schi sgür che bgeras famiglias chi intaunt sun idas in decadenza nun avessan gieu da fer piazza ad esters, e'l purtret da nossa populaziun füss sgür hoz bain different da que ch'el ais.

Da sieu discuors proferieu in occasiun da l'exposiziun agricola vuless suottastricher ils seguaints impissamaints:

«In üngüns sectuors, niauncha ill'industria e politica — e que eira ün temp da plain'evoluziun e revoluziun — nus s'haun mü-

dedas las relaziuns i'l ultim temp uschè fermamaing scu ill'agricultura. Üngün nun ais suottapost a telas transfurmaziuns scu l'agricultura e la vita dal pur. Trais forzas sun co vi da la lavur. Il prüm factur ais il fat cha la populaziun crescha ad ün crescer, e la sequenza ais cha'l bsögn da nudritüra dvainta saim-per pü grand ed uschè ais subentro incharimaint generel dal fuonz e'l prüvi.

Püinavaunt haun ils mezs da transport subieu ün perfecziunamaint considerabel, müdand uschè radicalmaing las relaziuns dal marchio. Ils pajais il pü luntauns staun in concorrenza ün cun l'oter cun lur prodots. In Svizzra cuschinains cun farina chi vain da l'America e fains paun cun furmoint da la Russia, impè ch'in Australia vain mangio chaschöl svizzer. Però bger pü grand'influenza ho il terz factur, nempe il grand progress illas cugnuschentschas da la natüra e sias scienzias e l'adöver per l'agricultura. Il pajais e'l pur chi nun tegna pass cul temp vo economicamaing in malura, perche hozindi ais l'agricultura dvanteda ün'art ed üna scienza. La vocaziun da pur stu gnir stimedada ed onuredada ed appredschedada dapü. L'agricultura in prüma lingia nudrescha l'umanited, la patria e la famiglia. Ella ais quella ch'ins sgüra l'indipendenza perche ch'ün pövel chi stu retrer tuot las robas necessarias da l'ester ais suottapost a grand prieveles. — L'agricultura in prüma lingia stendscha pü ferm ils liams da la famiglia e'ls santifichescha, perche cha in üngün'otra professiun nu sun ils members d'üna famiglia uschè dependents l'ün da l'oter ed haun d'imprender da giuven insü a's render servezzans vicendaivels ed a collavurer. Bain ingrazchains nus Engiadinains nossa benestanza a l'ester, però la furtüna da la vita e da la famiglia ans haun purtos in giuven e vegls dis noss pros, nossas alps e nossas stallas d'muaglia.»

Quist lod a la vocaziun dal pur nun eira üna lodavaglia u lusingia d'ün politiker speculativ. Bgeranz s'occupaiva Planta, taunt cu cha'ls affers publics al permettaivan cun preferenza a l'agricultura, illa quela el avaiva investieu üna granda part da sia faculted. Dasper sieus bains in Engiadina possedaiva'l duos grands complex ad Oberhausen ed a Tänikon i'l chantun da Turgovia. Cur ch'el ho cumpro quist bains, as rechattaivan els in ün stedi incultivo, per part pa-

lüdaint. Zieva ün trattamaint raziunel, urbarisand e fand spalüdamaint ho el fat landrouer baint exemplers. Per augmenter il richev e per pudair güder als purs da la cuntredgia ho'l drizzo aint ün mulin per ossa a Tänikon ed üna fabrica da tubs per spalüdamaint ad Oberhausen. Eir dasper Landquart avaiva el acquisto ün terrain plain gera e sablun. In colmatand quist bain da ca. 50 juhargas ho'l ragiunt üna cuverta da passa 1 meter terrain fertil. Pü cu la mited ais gnieu pü tard exproprio per la fabrica da la viafier Landquart—Tavo. Scha hoz ais colmato bod tuot la Tungias-cha cull'ova da la Nolla, schi ho Planta prasto la lavur da pionier sün sieu bain a Landquart. Sieu sen per dret e güstia e sieu caracter independent eiran cunt-schaints in tuot la Svizzra. Uschè ais el gnieu clamo püssas gedas scu güdisch arbitrari in questiuns traunter vschinauncas e chantuns. Dal 1849—52 ais el eir sto president dal güdisch districtuel da Malöggia. Siand el però fich suvenz absaint da l'Engiadina, ais el sto costret da's retrer da quist post. L'an 1856 ho el eir renunzcho per la seguonda gEDA ad üna candidatura illa regenza per part our da medems motifs, ma bain eir perche cha sieu spiert movibel nun avess brich cumporto a l'inlungia las chadagnas d'ün büro permanent. Planta avaiva il bsögn da perseguiter a medem temp böts tuottafat differents. Nus nu pudains bod niauncha incler inua ch'el ais ieu pel temp per praster tuot que ch'el ha prasto. Dasper l'administraziun da sia granda faculted eira'l ün grand temp da l'an occupo cul Cussagl naziunel e sias cumischiuns u cul Grand Cussagl, e dapertuot eira'l fich activ, sainza schmancher sia operusited a pro da las viasfier, da la posta e'l telegraf, dals bagns minerels, da l'agricultura, da l'economia alpestra e dals gods. Regulermaing scrivaiv'l artichels da fuonz per la pressa tudas-cha e rumauntscha ed appartgnaiva tals fondatuors dal Fögl d'Engiadina, dal Bund e dad otras giazettas. Tipic per Planta eira il fat, cha sias ideas pigliaivan dalum fuormas concretas e ch'el vzaiva il problems cun ögl cler. Invezza cha'ls bgers ed uschè differents problems chi l'occupaivan l'avessan stanglanto, augmentaivan quels sia elasticited. — Cha na be ils baints materiels al staivan a cour, ma güst taunt eir ils interess ideels da la patria e pustüt da nos chantun, demuossan sias grandas donaziuns a favur dal Museum retic, pustüt per la part dal temp antic. Eir la Biblioteca chantunela ho survgnieu sia voluminusa biblioteca rumauntscha e l'archiv chantunel na main da 12 chaschas manuscripts

chi sun gniew incorporos a quaist. Scu Engiadinais e pustüt scu bibliotecar da la Fundaziun Planta as pudess bod gnir illa tentaziun da cumplaundscher quista granda generusited. Per quaunt pü richa füss hoz l'Engiadina scha tuot quaists s-chazis as rechatessan auncha in Chesa Planta. Da l'otra part vulains esser grats ch'el ho miss a disposiziun a tuot il pövel grischn ed a la scienza ün tesor scu ch'üngün chantun muntagnard nu posseda. — Uschè ho Andreas Rudolf Planta sviluppo duraunt üna lungia seria dad ans ün'activited sainza cünguel, cur cha'l Venderdi sench dal 1889, 5 dis aunz cu cumplir sieu settaunt'evel an, la mort ho picho inaspettadamaing porta. El ais mort als 19 avrigl a Turich. Il di aunz avaiva'l auncha presidio üna conferenza d'üna cumischiun federela agricola ed eira turno cuntaint, ma ün po staungel a chesa. La damaun zieva as ho'l plaunt d'ün tschert melessen, sainza però cha sieu stedi da sandet avess pudieu der andit a temmas. Sieu figl Rudolf l'ho chatto zieva s'avair absanto ün momaint mort in sia chambra. Uen cuolp avaiva miss ün term a sia vita. Andreas Planta ha gieu la satisfacziun d'avair pudieu lavurer infin l'ultim di da sia vita. Pochs umauns haun pudieu guardar inavous sün ün'operusited curuneda da taunt success. Pochs hommens da stedi haun giodieu la fiduzcha dal pövel in tël möd scu Planta. Pochs haun impudieu tuot las forzas instancabelmaing pel bain public scu el. El ais sto ün republicaun da nom e da pom. Cha dischillusiuns ed attachas da melvuglientscha nu'l sun stedas spargnedas neir ad el ais chosa umauna e taunt inavaunt inclegiantaivla pustüt tar üna persuna uschè energica scu chi eira Planta. Però cur cha la fossa sü San Peter as serret il mardi da Pasqua sur sia spoglias mortelas resentiva tuot il pajais che ch'el avaiva gieu ed alura pers vi da cussglie naziunel Andreas Planta, perche el ais sto indiscutabelmaing il pü grand hom da stedi grischn dal tschientiner, e neir la Confederaziun nu ho gieu ün seguond, almain que chi riguarda ün operer instancabel ed universel. —

La giazetta «Schweiz» avaiva scrit già dal 65 cur cha Planta ais gniew tschernieu scu president dal Cussagl naziunel:

«Grischn cun corp ed orma, ais el a l'stess temp ün excellent Confedero. Scu ch'el cumbatta pels interess grischns, uschè sto el aint scu poch homens da stedi svizzers cur chi's tratta da politica ed economia federela. In dumandas economicas ais

Planta ün fervent hom dal progress, illa politica as tegna'l vi dal dret e da la particularited. Taunt scu Svizzer scu eir scu Grischun ais el tres e tres hom da stedi.»

In occasiun da sieu decess scriva il Journal de Genève:

«Suot sia chavlüra alva glüschivan forza e giuventüna. Uen nu pudaiva il tadler sainza as schmüravglier da sias vastas cugnuschentschas. El eira ün oratur insolit chi discurriva cun fö e flamma in üna lingua netta e s-chetta. Las dumandas trattaiv'l cun üna autorited incontestabla, e scha que faiva dabsögn schi attachai'el sieu adversari cun üna logica sainza pardun. Daffat sieus adversaris politics arcuntschaivan sieus talents e sieu nöbel character. Els vzaivan in Planta l'hom da stedi cun duns extraordinaris.»

Ed aint il Fögl d'Engiadina dal 4 meg scriva ün Engiadinais traunter oter:

«A l'ultima revisiun da la constituziun federela as mettet Planta cun sieu amih Dubs da la vart dals opponents, perche ch'el eira föderalist. El eira da la ferma persvasiun cha'ls chantuns nun as rechattessan auncha al tapin da stuvair as der sü, cha las relaziuns in Svizzra sajan memma divergentas per metter tuot suot ün chapè, cha tres la centralisaziun gnarò necessariamaing a crescer la bürocrazia e scurznida la liberted, e cha nos chantun impustüt cun sia istorgia particulera e sias relaziuns pitschnas possa il main da tuots cunvgnir da der uschè bunmarcho il maunch our da maun.

Il defunt eira üna vair patriot, ün sincer amih dal pövel, ün character schlass ed independent, hom d'iniziativa d'ün'activited exemplera, adüna al timun dal progress e pront a megliorer e promover il bainesser generel. Lotiers eira el ün spiert viv ed expansiv e saimper da bun umor e da buna cumpagnia, amiaivel cun minchün e pront a güder inua cha faiva dabsögn, ün amih dals amihs.»

Gian Fadri Caderas ho scrit i'l medem Fögl:

«El nun ais pü — dalönts ch' spartit
mi'Engiadina ün figl dilet,
Dandettamaing, scu'l güst murit
quel chi ma valleda taunt benefizet.
Per el, o crida, crida patria mia,
e güstamaing pel el, tü poust crider.
Bain pü d'ün tel resainta uoss'aquia
Il vöd ch' lascha traunter nus il cher.
Il spiert dal grand, da l'ot da la collina,
inua el repos'in sa chambretta d'lain
Benign ch'el guarda sur noss'Engiadina
scu füs vivaint, cun sieu surrir serain.